

07/10/2000

Perjuangan asal perlu dipertahan

KOTA BHARU, Jumaat - Datuk Seri Dr Mahathir Mohamad meminta ahli Umno supaya kembali kepada perjuangan asal membela rakyat bagi memulihkan sokongan masyarakat Melayu terhadap parti itu.

Perdana Menteri berkata, tahap pencapaian dan kejayaan usaha itu bergantung sepenuhnya terhadap iltizam serta kerajinan ahli 'turun padang' untuk mendekati rakyat.

Beliau yang juga Presiden Umno berkata, Umno perlu bekerja kuat demi mempertahankan perjuangan parti selain menjadi lambang kuasa dan kedaulatan orang Melayu serta Islam.

"Setelah 54 tahun Umno ditubuhkan dan 43 tahun negara mencapai kemerdekaan hasil perjuangan pemimpin Umno terdahulu, negara dan rakyat kita yang ditadbir Kerajaan Barisan Nasional (BN) dengan Umno sebagai tunggakunya telah banyak mencapai kemajuan dan kemakmuran.

"Namun hari ini kita melihat Umno yang telah banyak berjasa kepada orang Melayu khususnya mulai ditolak.

"Malah, musuh-musuh Umno dengan lantang memupuk sifat kebencian terhadap Umno dan pemimpin Umno dengan menuduh pemerintahan Kerajaan yang dipimpin Umno sebagai zalim dan tidak menurut prinsip Islam," katanya dalam perutusan buku cenderahati sempena Konvensyen Umno Kelantan di sini, esok.

Konvensyen sehari bertemakan 'Umno Kuat, Islam Kuat' itu dijangka dihadiri kira-kira 1,600 peserta mewakili Umno bahagian, pertubuhan bukan kerajaan (NGO), Dewan Perniagaan Melayu Malaysia (DPMM), Persatuan Kontraktor Melayu, Persatuan Bekas Tentera Malaysia (PBTM) dan kesatuan guru.

Dr Mahathir berkata, konvensyen kali ini perlu dijadikan landasan bagi menilai kedudukan Umno di kalangan orang Melayu Kelantan, di samping memberi peluang bagi Umno menangani masalah dan cabaran di Kelantan.

Beliau turut berharap supaya konvensyen sehari itu berjaya membahas dan mencari jalan penyelesaian sesuai bagi menentukan kejayaan Umno di Kelantan, khususnya di Kelantan demi masa depan orang Melayu.

(END)